

BDB FOKUS TERAS PERNIAGAAN, SASAR PEMULIHAN KUKUH TAHUN 2026

ALOR SETAR – Bina Darulaman Berhad (BDB) menyasarkan pengukuhan perniagaan teras serta pengoperasian yang lebih fokus pada tahun 2026 bagi mengembalikan keuntungan, meningkatkan kecekapan pelaksanaan dan membina asas yang lebih berdaya saing untuk pertumbuhan jangka panjang.

Ketua Pegawai Eksekutif Kumpulan, Che Abdul Khalid Md Din berkata, tahun 2026 akan menjadi tempoh penting dalam usaha transformasi syarikat untuk mencapai sasaran Kumpulan.

Menurut beliau, BDB kini memberi penekanan kepada pengukuhan empat segmen perniagaan teras yang menjadi tunjang utama kumpulan iaitu pembinaan jalan dan kuari, hartanah, kejuruteraan dan pembinaan (E&C) serta segmen leisure, sebagai asas kepada pemulihan dan pertumbuhan mampan syarikat.

“Tahun 2026 adalah tahun untuk BDB membuktikan keupayaan sebenar dengan memberi fokus kepada pemulihan, memperkemas operasi dan membina semula keyakinan pemegang taruh terhadap BDB.

“BDB turut memberi penumpuan kepada kekuatan perniagaan teras, memperkasa pengurusan kos secara lebih disiplin serta melaksanakan strategi yang lebih berimpak tinggi dalam setiap peluang perniagaan yang diterokai bagi memastikan mendapat pulangan yang lebih baik.

“Matlamat utama bukan sahaja untuk mengembalikan BDB kepada landasan keuntungan tetapi memastikan syarikat mempunyai asas perniagaan yang lebih kukuh untuk pertumbuhan jangka panjang,” katanya dalam kenyataan di sini.

Beliau berkata demikian pada Mesyuarat Agung Tahunan BDB ke-31 yang berlangsung di Hotel Jerai, Alor Setar, Kedah, yang turut dihadiri Ahli-ahli Lembaga Pengarah serta pengurusan kanan Kumpulan BDB.

Perancangan dan Sasaran Tahun 2026

Mengulas lanjut, Che Abdul Khalid berkata BDB akan mempergiatkan usaha meneroka peluang perniagaan baharu merangkumi projek sektor awam dan swasta, selain menjalin kerjasama strategik termasuk dengan Kumpulan Perbadanan Kemajuan Negeri Kedah

Menurut beliau, BDB kini bukan sahaja berperanan sebagai pemaju perumahan, malah telah mengembangkan penglibatan dalam penyediaan infrastruktur kawasan sektor perindustrian dan perkilangan sekali gus memperkukuh portfolio dalam segmen E&C.

“BDB akan lebih agresif dalam mendapatkan projek berkualiti serta memastikan setiap projek dilaksanakan dengan kawalan kos dan disiplin operasi yang tinggi. Pada masa sama, kami komited memperkukuh hubungan dengan pemegang taruh bagi membina keyakinan berterusan terhadap hala tuju BDB.

“Dalam segmen pembangunan hartanah, BDB akan terus memberi fokus kepada projek sedia ada termasuk di Darulaman Saujana, Hosba, Aman Nusa, Langkawi serta Bandar Darulaman, Jitra. Selain itu, pembangunan terbaharu Darulaman Commercial District dijangka menjadi pemacu pertumbuhan yang akan menyumbang kepada pendapatan jangka panjang.

“BDB juga akan memperhebat usaha pengoptimuman aset strategik termasuk Darulaman Sanctuary dan The LAB di Langkawi, serta aset pelancongan seperti Fantasia Aquapark. Usaha memperkasa serta mempelbagaikan tarikan di Darulaman Park juga dijangka menyumbang prestasi positif kepada segmen leisure pada tahun ini,” katanya.

Untuk rekod, bagi tahun kewangan berakhir 31 Disember 2025 (FY2025), BDB mencatatkan kerugian bersih sebanyak RM16.80 juta yang dipengaruhi oleh beberapa faktor utama termasuk kelewatan dalam pelancaran projek hartanah, serta tekanan margin yang berpunca daripada beberapa projek infrastruktur yang menghampiri fasa siap. Bagaimanapun, kumpulan merekodkan peningkatan hasil kepada RM330.71 juta, berbanding RM294.74 juta pada tahun kewangan sebelumnya.

LATAR BELAKANG BINA DARULAMAN BERHAD

Bina Darulaman Berhad (BDB) telah ditubuhkan pada 7 Februari 1995 dan telah disenaraikan di Bursa Malaysia. BDB merupakan sebuah syarikat pegangan pelaburan yang bertanggungjawab dalam pembangunan hartanah, pembinaan, kerja-kerja jalan, kuari, leisure dan tenaga boleh diperbaharui melalui anak-anak syarikatnya iaitu BDB Land Sdn. Bhd., Kedah Holdings Sdn. Bhd., BDB Synergy Sdn. Bhd., BDB Infra Sdn. Bhd., BDB Leisure Sdn. Bhd., BDB Darulaman Golf Resort Berhad, Darulaman Sanctuary Sdn. Bhd, dan BDB Energy Sdn. Bhd.

Untuk maklumat lanjut, boleh menghubungi:

I. Fadzli Ramlan

Tel: +6017 2088609

Emel: fadzli.ramlan@bdb.com.my

Group Corporate Communications

II. Ikhwan Hazwan Hamidun

Tel: +6019 5517225

Emel: ikhwan@bdb.com.my

Group Corporate Communications